



*Sabtu, 6 April 2024*  
**Ogen: Matius 4:18-22**



**Njala**



**I**benaken tahun 2003 me iperingeti hari nelayan Indonesia, e me sue ras keputusan presiden Indonesia sipaksa e Megawati jadi presiden. Tanggal enda ipilih guna enghamati perjuangan nelayan ngelawan 'eksploitasi' sumber-sumber lawit Indonesia. Nelayan e me sada pendahin nangkap nurung, umumna ilakoken secara tradisional e me njala, adi i bas kelompok sikitikna biasana ngkawil. Peringeten enda pe jadi kesempatan ngataken bujur dengen arapen gelah banci memajukan kesejahteraan kalak sidahinna sebage nelayan.

Mbelin kal gunana pendahin siilakoken nelayan enda, i ja ia ncukupken keperluan daging kula manusia e me protein ras gizi arah nurung siipeluken guna bengkau gelah sehat daging kulanta. Bageme i bas renungenta enda, ituriken kerna pendahin sebage nelayan enda nai nari enggo lit khususna man masyarakat si nggeluh isekitar pantai, deher lawit. Jesus i bas karya dengen rancangan masa depan mbangun konsepna i bas ndilo ras mpersadaken kalak jadi pengikutna. Njala sibiasana ilakoken guna ndatken nurung i lau, ijadien sada palsafah guna ndilo kalak sideban ku bas rarasen kalak si tek. Enda me sebage mbelin pendahin (profesi) ajar-ajar Jesus sope ngikutken IA. Ituriken i bas renungennta, kuga Jesus ndilo empat kalak penjala nurung jadi ajar-ajarNa. Empat kalak enda e me Simon Petrus, Andreas, Jakub ras Johanes. Pendilo Jesus man bana minter iresponna alu ngikutken Jesus, itadingkenna perahuna, itadingkenna bapana.

'Njala tah rani nina e, anding-andingen nge kap e...' Ende-enden enda jadi sada pujin man Dibata siningetken maka njala jadi gambaren proses ndilo manusia jadi ajar-ajarNa. Enda pe njemba kita tetap mere diri jadi penjala manusia. Mari siperingeti wari nelayan alu ngumban biak penjala, si pang ngalaken angin medermes guna ndatken ikan.